

電報

南京孫逸仙致袁全權電 陽歷十四日

今日文借各部總正長到參議院辭職已得承諾以新總統接事爲解職期同時文推薦執事爲臨時大總統明日二時參議院開選舉會先此電聞伍秩庸唐少川已到甯孫文叩

袁全權覆電 陽歷二月十五日

孫大總統鑒惠電拜悉慚悚萬狀執事謙沖莫名欽佩但時艱方殷萬端待理斷非袁庸如凱者所堪勝任倘不量而入恐無以副國民付託之重及執事推薦之殷切盼參議院另舉賢能使凱得徜徉山林長作共和之國民斯願足矣不盡下情已託唐少川轉達一切袁世凱咸

濟南致袁全權電 十二月二十六日

竊以天生神禹以平洪水天生周公以治夷狄猛獸有一代之變故必有一代之偉人維持其間今我中國之禍亟矣九重不忍塗炭生民上承 懿旨俯從輿情宣布共和公諸天下

而統一南北之大機關促行內治外交之大建設苟非公舉得人不足繫人心而拯危局曠觀當世推論雄才求其內諳政體外固邦交威望足以服人明略足以濟變馭羣下而指揮若定膺艱鉅而精氣不衰器識閎深智慮卓絕中華之內無有出我公之右者則臨時大總統一席非我公孰克當之皇室得保優待之尊榮薄海得享和平之幸福不至滅種亡國爲天下笑我公之力焉此天下之公言非廣建等之私言也呼吸存亡毋庸再計伏願我公早膺大總統一席力任其難以慰四萬萬同胞之望大局幸甚天下幸甚謹聯合公推不勝迫切待命之至署山東巡撫張廣建會辦山東防務五鎮統制吳鼎元登州鎮兼右路統領葉長盛兗州鎮兼前

路統領田中玉曹州鎮兼右路統領張善義署藩司余則達署提學司方燕年署提法司丁道津鹽運司聶憲藩巡警道吳炳湘署勸業道劉崇惠署濟東道何澍署堯沂道莊洪烈試署廳丞龔積柄試署檢察長虞維鐸署濟南府車保成署歷城縣周炳文陸軍九協統領馬良十協統領張樹元中路巡防統領孔慶塘後路統領方致祥沂防統領楊德滋統領先鋒等營蘇緒謨統領警防各營吳攀桂幫統巡防等營吳桐仁統帶新防等營戴以庸分統後路等營劉長英通省候補道府州縣在任府廳州縣及陸防各軍標統管帶九十三標統帶李森九十四標統帶王學彥等衍聖公孔令貽及在籍紳士道員汪懋現孟繼笙毛承霖侍讀學士王錫蕃學界編修莊陔蘭馬蔭榮主事石金聲御史范之杰道員丁維魯諮議局編修楊毓泗道員王景禧于普源商會董士職員劉延佐鄧文治張有執李仁實暨通省商民人等同叩

蒙古王公聯合會致各省通電 十二月二十二日

南京孫逸仙君黃克強君及臨時政府各部長參議院全體議員武昌黎宋卿君上海都督廣東都督廣西都督雲南都督貴州都督浙江都督江蘇都督江西都督湖南都督安徽都督四川都督陝西都督奉天制台直隸制台山東撫台山西撫台河南撫台新疆撫台吉林撫台黑龍江撫台陝西撫台甘肅制台奉天諮議局山東諮議局雲南諮議局江蘇諮議局湖北諮議局直隸諮議局山西諮議局貴州諮議局浙江諮議局河南諮議局陝西諮議局四川諮議局廣東諮議局安徽諮議局吉林諮議局甘肅諮議局江西諮議局黑龍江諮議局新疆諮議局廣西諮議局湖南諮議局各鎮統協統各師團長各司令長均鑒天佑吾國確定共和惟時局之艱已臻極點補救建設勢須同時並進南北合一政府非得外交軍事聲威顯著之人難資

三
統理項城於大局一事始終苦心孤詣竭力維持權實兼施恩威並洽卒收轉旋之效厥功至偉且政治經驗至富軍隊尤極推崇同人僉謂統一政府臨時大總統一席必須項城力任其難方能維繫衆心保全大局本會亦可藉手助籌綏馭蒙疆事務現已公同議決由本會代表全蒙推項城任統一新政府臨時大總統以冀收建設之功兼保和平之局公等熱心國事諒必樂予贊成除向項城陳請外爲此通電諸公即希察照備案見覆爲盼蒙古王公聯合會叩

天津覆蒙古王公聯合會電

養電悉統一政府誠如尊論非外交軍事聲威顯著之人難資統理貴會提議擬請項城力任其難芳深表同情除另電陳請外此覆芳敬

順直諮議局覆蒙古王公聯合會電 十二月二十六日

養電敬悉現值共和初建時局危迫一切內政外交非項城莫能統屬所稱舉任統一政府臨時大總統一節實全國人民一致之心理貴會首先議決全體推崇實屬關懷國是保全大局本局極表同情此後漢滿蒙回藏來往一堂尤望彼此提挈共圖宏濟至爲禱企特此電覆順直諮議局叩

山東覆蒙古王公聯合會電

蒙古王公聯合會公鑒養電敬悉時局至此極盼解決現在國體問題既已確定共和補救建設必須有統攝機關方能收一致進行之效臨時政府統一南北建立至不容緩惟總統一席責任至重項城經權互用威德兼施內政外交經驗至富此次力顧大局苦心孤詣始終維持

爲軍民所共諒實中外所同欽貴會以總統推請俾項城力任其難藉以維人心而挽危局山東官紳學商各界深慶幸共表同情謹遵來電備案專肅奉答山東巡撫張廣建會辦吳鼎元暨各司道各路總兵各營統領及紳學商各界同叩

太原諮議局覆蒙古王公聯合會電 十二月二十六日

養電謹悉尊會爲保全大局起見敝局均爲贊成晉諮議局

濟南紳士吳樹梅等致袁全權電 十二月二十七日

恭讀二十五日 諭旨業經解決政體宣布共和媿隆堯舜邁迹歐美創中國數千年未有

之局慰四海億萬兆蒼生之望若非我公大力斡旋何以臻此然共和之後保衛皇室統一軍隊藩服之綏和南北之聯絡杜外人之覬覦保內地之公安一切建設維持惟賴總統得人始得達和平目的我公爲政界第一偉人威德兼隆又富於政治經驗總統一席非我公孰克當此務懇俯從衆望力任其艱挽回危局俾中國日臻富強大局幸甚除請山東巡撫張領銜公電瀝陳下情外理合再行電懇不勝迫切待命之至前戶部左侍郎吳樹梅翰林院侍講學士王錫蕃編修楊毓泗莊陔蘭馬蔭榮江蘇候補道汪懋琨孟繼笙候補道毛承霖朱壽蕃于景源李嵩年候補知縣趙正印都察院掌安徽道監察御史范之杰度支部主事石金聲蕭樹聲趙錄俊徐步聯典禮院主事張敬承民政部主事王訥趙錄績孔昭曾錄事王鳳藻法部郎中陳昂主事石熙祚石彝祚七品小京官莊余珍直隸候補道王景禧丁惟魯候補知縣李繼璋候補通判李守中分省補用道劉恩駐浙江候補同知莊鈺補用知縣張登愷廣東候補知縣孫積蔭孔昭諤王宗亭湖北候補知縣譚奎翰張春海省視學王炳奎直隸鹽大使張錫年山

西優貢知縣張景灝四川鹽大使徐旋元候選同知嚴西清宥

濟南紳士孟繼笙等致袁全權電

聞共和業已宣布南北兩方面人民均推我公爲南北合一新政府臨時大總統仰見宏猷偉略涵蓋海內大任之膺非公誰屬蓋今日遺大投艱之責惟公足以當之而扶危定傾之功亦惟公足以廣之喁喁衆志跂仰同殷伏念大清 皇太后居處深宮不預外政大清

皇帝踐祚數載正在冲齡今因保海內之治安慨然辭位此實三代以後中國帝王所不能企及萬一者也我公受此鉅任所望勉爲其難於優禮皇室條件極力維持并使海內蒼生再享治安之福山東幸甚中國幸甚除請山東巡撫張領銜公電并會同紳學商各界聯銜電陳外謹再陳請在籍江蘇候補道孟繼笙汪懋現候選道毛承霖侍講學士王錫藩等公叩有印

河南教育會會長李時燦等致袁全權電 十二月二十七日

天造中夏 兩宮暨滿漢蒙回藏同主共和惟非統一機關不足挽時局非命世英傑不足繫人心臨時統一政府總統一席願公力任其難提携南北名流大新庶政以赴時機而慰衆望四萬萬同胞幸福不獨桑梓私榮也河南教育會會長李時燦楊源懋謹代表兩河士子恭懇

開封王署藩司致袁全權電 十二月二十七日

政體宣定遐邇推戴萬衆傾心水深火熱亟待拯救天下艱鉅非公誰任懇勿固辭祖同稟廿六

來函

十二月二十九日

蒙古王公聯合會致袁全權函 十二月二十七日

天佑吾國賴公之力確定共和後此建設方新非得聲威顯著之人不足當統理南北政府之任我公於大局事始終苦心孤詣不恤疑謗不避險艱卒能措天下於泰山之安躋五族於和平之域功在寰宇德在生民凡屬有知同深推戴查蒙古各部因時艱孔棘外侮方滋本會同人等前此欽仰我公威德知必能拯此橫流是以聯合同人力爲維護不令於共和一舉別生異議現大局猶定自非我公仍任其難難免不生枝節現已通電各處由本會代表全蒙推公爲統一政府臨時大總統謹再代表全蒙具函陳請務懇我公力任天下之重以繫衆心俾同人等亦可藉手助籌綏馭蒙疆各務臨穎不勝翹盼謹祝幸福蒙古王公聯合會同人等頓首

北京辛亥俱樂部全體會員來函 十二月二十七日

全權組織政府首領公鑒現在大清 皇帝業已辭位中華民國臨時政府急宜成立當此建設伊始所有統一南北鎮撫軍隊刷新政治應付外交非得負有中外重望之總統萬難膺茲艱鉅本會全體會員決議以我公於政治經驗軍人威望外交信用實爲中國一人此次解決國體始終抱定和平宗旨苦心幹旋卒能得圓滿之結果尤爲國民所深感臨時大總統舍公莫屬伏望俯順輿情顧全大局肩此鉅任以福吾民中國幸甚辛亥俱樂部全體會員呈